

REGIONAL NEWS

HEADLINES:-

1. Chief Minister Pu Lalduhoman leh Prime Minister Pu Narendra Modi chu vawiin khan N. Delhi-a Prime Minister chenna inah an inkawm.
2. MHIP kum 50-na, Golden Jubilee chu vawiin khan Mizoram hmun hrang hrangah lawm a ni .
3. Tamil Nadu State BSP President K.Armstrong kum 52-a upa chu nizan khan Chennai-a a chenna inah mipui pungkawmin an that
4. UK Prime Minister thar Keir Starmer chuan UK chanchina hmeichhe cabinet member tam ber tum ni turin hmeichhia 11 cabinet ah a telh.

<><><>

CM MET PM

Chief Minister Pu Lalduhoman leh Prime Minister Pu Narendra Modi chu vawiin khan N. Delhi-a Prime Minister chenna inah an inkawm a,

An inkawmnaah hian Assam Rifles sawn chhuah chungchang te, Mizoram Sorkar Handholding Policy chungchang bakah Bangladesh atanga lo lut Zohnahthlak Bawm unaute chungchang te an sawi a. Chief Minister hian, Zohnahthlak Bawm unaute Bangladesh atanga himna zawnga Mizoram rawn lut te chu a thawnkir theihloh thu chiang takin Prime Minister hnenah hian a sawi niin sorkar thuchhuah chuan a sawi a ni.

Prime Minister hi Mizo thar- thei leh chawhmeh hrang hrang Sapthei, Dragon Fruit, Balhla leh Mautuai te a pe a. Prime Minister hian a lo ngaihlulawm hle. Sapthei phehi hi chu a lo la hmu ngai lova, a ei dan tur thlengin a zawt a ni.

Heng thei hrang hrangte hi kuthnathawktute dinhmun leh Mizoram economy tihmasawna tura pawimawh tak a nih theih thute Chief Minister hian Prime Minister hnenah hian a sawi a ni.

Chief Minister Pu Lalduhoma chuan vawiin vek khan Minister of Minority Affairs and Minister of Parliamentary Affairs Pu Kiren Rijiju chu a chenna inah a hmu a, Pu Kiren Rijiju hian PMJVK hnuai Mizoram in project 65 a neih zinga hmanhawthlak zual 29 chu tihhlawhtlinsak vat a lo tiam a, a bak project 36 pawh bawhzui vat a tum dawn tih a lo hrilh a ni.

<><><>

MHIP GOLDEN JUBILEE

Mizo Hmeichhe Insuihkhawm Pawl (MHIP) kum 50-na, Golden Jubilee chu vawiin khan Mizoram hmun hrang hrangah lawm a ni a, a lawmna pui ber chu Aizawl Sipai Lammualah neih a ni.

Aizawla hun hmanpuitu Home Minister Pu K. Sapdanga chuan Mizorama tlawmngai pawl te chu Missionary-te hrin niin an din hun inang lo mah se a thil tum chu Mizo puite thatna tura rawngbawlsak a ni tih a sawi a. YMA, MHIP leh MUP te chu chhulkhat chhuak an ni tih a sawi bawk.

Pu K. Sapdanga chuan, vantlang hnathawh kawngah MHIP in kum 50 chhunga hna a thawhte chu a tamin sorkar suma thawh sen rual loh a ni, a ti a. Khawtlang nunah Mizo hmeichhia te chu kawng hrang hranga hmahruaitu pawimawh an ni a ti.

(BYTE)

He hun hmanpuitu dang, Social Welfare Minister Pi Lalrinpuii pawhin thu sawiin, tun hma chuan Mizo hmeichhe zingah tanpui leh chhawmdawl ngai an tam thin a, tun hnuuah erawh MHIP hmalakna avangin chhungkaw thenkhat a hmeichhe rahbi tleu

deuh te awm mah se hmeichhia ten hma an sawn nasa tawh, a ti. Pi Lalrinpuii chuan Tun hma ang lo deuhin Mizo nu ten chungkaw sum an vawng a, hei hi a lawmawm rualin mawhpurhna a keng tel tih hriat a ngai a ti a. Heng bakah hian hmeichhia, a bikin Nu ten sakhua leh hnam nunphung vawng him turin Mizo hmeichhia te an thanharh a pawimawh tih a sawi bawk a ni.

Lunglei MHIP Sub.Hqtrs. chuan Saikuti Hall ah an pawl kum 50 na an lawm a. Branch hrang hrang ten chanvo chi hrang hrang te lantirin zaipawl leh recitation ngaihthlak tur a awm a, NCD chungchangah Dr. C.Lalhlmpuiin zirtirna a pe a ni.

Champhai District a Branch hrang hrang-te pawhin urhsun takin an hmang a, Branch thenkhat chuan nizan atangin he hun hi hmang tanin, waviin khan Item chi hrang hrang hmanga intihlimna hun te hmangin tlai lamah MHIP Golden Jubilee lawmna ruai an kilho hlawm a ni.

MHIP kum 50-na lawmna hi Serchhip Auditorium Field Vengah pawh neih niin, he hun hi Judicial Magistrate Pi Josangzeli Tlau a hmanpui a. Pi Jojo-i chuan thu sawiin, thil kawng hrang hrangah dan hnuai kal a him a ni a ti a.

Hmanlai ai chuan hmeichhia ten humhalhna tha an dawng tawh a, chu chu hriat tum tur a ni tiin, ram leh khawtlang siamtha tura nu mawhpurhna hriat thar a tul thu a sawi bawk.

Kolasib-ah chuan MHIP Golden Jubilee lawman hi YMA Hall-ah neih a ni a, Assembly Dy Speaker Pu Lalfamkima'n a hmanpui. Pu Lalfamkima chuan thu sawiin, MHIP chu an member te tan chauh nilo; an hmeichhiatpui leh chanhai zawkte tan a tangkai hle thin tiin, harsatna tawktu hmeichhiate tana hma an lak thin avang leh hum sual daite tan pawh inngahna tlak pawl pawimawh tak anih thu a sawi.

MHIP Sub - Hqtrs Mamit buatsaihin Chhim veng YMA hall, Mamitah MHIP day vawi 50na Mamit Khawpui chungah MHIP branch hrang hrangte'n a huhovin lawmna an buatsaih a. Pi Esther Zorini Hahnar Judicial Magistrate chuan Hmeichhe humhalna dan zirtirna a nei a, he hunah hian khawpui chung MHIP Branch hrang hrangte chu lengkhawmzai intihsiakna an neih bakah, Recitation, leh zaithiam zai ngaihthlak a ni bawk.

MHIP Sub - Hqtrs Mamit te hian MHIP day pualin, Mamit District Hospital Poor fund atan Rs 5000/ bakah damlo zar hliahna tur puan panga an hlan bawk.

Saitual khawpui chungah MHIP Branch hrang hrangte chuan MHIP Day vawi 50 na uar takin an lawm. MHIP Day hi member in tihlim nan te, infuih tharna leh hruaitu hlui chawimawi nan te hun hman a ni a, member kum lama upa telte chu thilpek an pe. Kumin hi Golden Jubilee kum a nih angin Branch tinten ruai nen ropui takin an lawm a ni.

<><><>

MSPMC TEAM VISIT

Mizoram State Project Monitoring Committee (MSPMC) Team 'B' te chuan Zoram Medical College, Falkawn a Girls Residential Hostel leh Intern Hostel sak hna kal mek an endik a.

Cheng vbc 10 ve ve senga sak tur niin hna hi zaa 94 zawh tawh a ni a. MSPMC Team hian heng Residential Hostel te hi Plan anga sak ani em tih an endik a. Siamthat ngai leh hmalakna tur point hrang hrangte chu Department hotute leh Contractor-te nen ZMC Committee Room-ah an sawiho a ni.

Hemi hnu hian MSPMC Team te hian 'Ropuiliani Freedom Fighter Museum, Kelsih' sak hna kal mek chu an endik leh a. MSPMC hian hemi hnathawh dan hi uluk leh chik takin alo endik tawh a, a hna tha lo lai te siamthat dan tur rawtna hrang hrangte MSPMC General Body Meeting in an lo rel tawh bawk a. Hemi hnu hian Nodal Department, Social Welfare & Tribal Affairs Department leh Contractor te hnenah rawtna engemaw zat an thlen leh tawh a. Heng rawtna an thlen tawhte leh hmalakna tur an lo ruahman tawh anga bawhzui ani em tih MSPMC Team te hian an

endik a ni. MSPMC hian Ropuiliani Freedom Fighter Museum hi ruahman ang taka a puitlin a, tangkai taka chhawr anih theih nan vil chhunzawm zel an tum a ni.

Mizoram State Project Monitoring Committee Team hi Pu R. Lal Rinawma, IRS (Rtd.), Vice Chairman-in a ho a ni.

<><><>

WORLD ZONOSSES DAY

World Zoonoses Day 2024 chu vawiin khan Mizoram sorkara Centre for One-Health, AH & Veterinary Department bul tumin Aizawl Khatla-a Veterinary Polyclinic Hospital-ah a hman a ni.

He hun pawimawh tak hi Polyclinic Joint Director Dr M. Zohmingthangi'n kaihuaiin Additional Director Dr R. Zothanmawii chuan thusawiin, ran enkawl danah fimkhur a ngai a ti a, ran vulh te an hrisel loh chuan an hnen atangin mihringin natna chi hrang hrang a kai theih a ti a, ran te uluk leh fimkhur taka enkawl an ngai tih a sawi.

Kumina World Zoonese Day thupui chu 'Ran atanga hri in kaichhawn theih te khuahkhirh leh umbo tura tan rual' tih a ni a. Kum 1996 July ni 6 khan France ramah Louis Pasteur chuan a vawi khat nan Anti-rabies vaccine naupangah a pe a, he Ni pual hian World Zoonese Day hman tan a ni.

World Zoonoses Day pual hian Free Anti-Rabies Vaccination camp hman nghal a ni a, ui leh zawhte engemawzat Anti rabies vaccine hi a thlawn a pek an ni. Anti-rabies vaccine hi World Health Consortium te tanpuina atanga pekchhuah a ni.

<><><>

BSP PRESIDENT

Tamil Nadu State BSP President K.Armstrong kum 52-a upa chu nizan khan Chennai-a a chenna inah mipui pungkhawmin an that. Chief Minister M.K.Stalin chuan police te chu BSP President thihna hi chhui tur leh pawikhawihute man chhuak ngei turin thu a pe a. BSP President Armstrong thah a ni chu pawia tih thu leh a chungte bakah an party worker te a tawrhpuia thu a thawn a ni. CM Stalin-a chuan police in mi pariat an man tawh thu a sawi bawk a ni.

Political Party hrang hrangte chuan politics dah tha in inthahna thleng an dem thu leh misualte manchhuak vat tura an duh thu an sawi.

<><><>

UK ELECTION

UK Prime Minister thar Keir Starmer chuan a cabinet member tur a thlang fel a. Deputy Prime Minister atan Angela Rayner a ruat a. Cabinet member 25 ah hmeichhia 11 ruat niin hei hi UK chanchina Cabinet member hmeichhia an tam ber tum a ni.

Puan tawh angin UK inthlanpui neih zawh takah Labour Party ten seat 650 ah 412 la in hneh taka thlan tlin an ni a.Hemi hnu hian Pu Starmer hi King Charles-a chuan Buckingham Palace ah sawrkar thar siam turin a sawm a ni.

Labour Party te hian kum 10 chung opposition an nih hnuah sawrkar an siam dawn a. Inthlana hnehna an chan hnu lawkah kum 61-a upa Starmer chuan mipuiin inthlak danglam duhin an thlang tling a,hei hi a takin a thleng chho mek a ni a ti.

<><><>

PRESIDENT

President Draupadi Murmu chuan vawiin khan ni li cham turin Odisha a thleng. President Murmu-i hian a pianna state ah hian khawvel huap pawha hmingthang naktuka Rath Yatra buatsaih a hmanpui dawn a. Hei bakah hian Utkalmani Pandit Gopabandhu Das-a thihcham vawi 92 na Bhubaneswar ah a hmang dawn bawk a ni.

Odisha-a a cham chungin Udayagiri leh Khandagiri cave a tlawh ang a. Bibhuti Kanungo Collenge of Art and Crafts leh Utkal University of Culture zirlaite nen an inkawm bawk ang.

<><><>